

春秋傳

一之五

三十三

漢書門類				
二	六	三	九	三
一	三	二	五	八
五	八	五	冊	架

內閣文庫				
三	九	函	五	冊
二	八	冊	五	架
漢	書	類	號	冊

總經

內閣文庫			
番號	漢	2063	
冊數	365	(254)	
函號	369		



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



宋劉公是先生著

春秋傳

通志堂藏板

劉公是春秋序

淺草文庫



石林葉氏謂慶曆間歐陽文忠公以文章擅天下世
 莫敢抗衡劉原父雖出其後以通經博學自許文忠
 亦以是推之作五代史新唐書凡例多問春秋於原
 父又曰原父為春秋知經而不廢傳亦不盡泥傳據
 義攷例以折衷之經傳更相發明雖間有未然而淵
 源已正今學者治經不精而蘇孫之學近而易明故
 皆信之而劉以難入或詆以為用意太過出於穿鑿
 彼蓋不知經無怪其然也石林所謂蘇孫蓋指子由
 莘老也晁公武謂劉氏傳如桓無王季友卒晉命用
 郊之類皆古人所未言諸公之推伏原父者若此今

觀權衡之作折衷三家傍引曲證以析經義真有權
 之無失輕重衡之得其平者傳十五卷集眾說而斷
 以己見文類公穀獨意林一編元吳萊謂多遺缺疑
 未脫藁之書然究而論之皆經學名書也宋四明史
 有之刊權衡意林於清江其本猶有傳者傳則出於
 錄本人或以為非真觀其文義與二書合疑非贗鼎
 故并刊之以傳示學者

康熙丙辰納蘭成德容若序

春秋劉氏傳第一

隱公

元年春王正月傳曰元始也正正也君即位必以正
 始言之加王為大受命也何言乎大受命王者受命
 於天諸侯受命於君曷為先言春而後言王王者法
 天也公何以不言即位成公意也何成乎公之意公
 欲讓國也公欲讓國奈何隱公之與桓公皆惠公子
 也隱公長桓公幼惠公愛之欲使為嗣而不可則以
 命隱公隱公既即位弗忍背也終將致國乎桓曰吾
 為子攝矣然則正乎不正不正則其言成之何將以
 惡桓也曰能以國讓是非賢乎三月公及邾儀父盟
 于蔑儀父者何邾之君也何以名字也曷為稱字附

庸也附庸則何以稱字諸侯稱爵大夫稱名賤者稱人何如則謂之附庸公侯百里伯七十里子男五十里不及五十里附於諸侯曰附庸公九命侯伯七命子男五命附庸四命盟者何殺牲載書而約也會者何約信命事而不殺也盟曷為或言會或言及及直及也會又會也古者六歲而會十二歲而盟亟會非禮也亟盟亦非禮也夏五月鄭伯克段于鄆克之者何戡之也戡之者何殺之也何以不言殺段有徒衆非直殺一人者也段有徒衆奈何鄭武公夫人曰姜氏生莊公寤生及大叔段段多材而好勇夫人愛焉請於武公以為後不可武公死莊公立夫人請分國

以封段段封於京繕甲治徒將以襲鄭夫人將間之國人不義莊公伐諸京大叔出奔公追而殺諸鄆然則何以不言弟段不弟故不弟也討賊者稱人以殺之此殺有罪其稱鄭伯何殺世子母弟自君甚之也曷為甚之鄭伯將封段祭仲諫曰無以為也都城過百雉國之害也故先王之制大都三國之一中都五國之一小都九國之一今京已侈侈必僭僭必亂若王制何莊公曰夫人欲之無所辟段使西鄙北鄙貳於己公子呂曰國不可貳貳則失民不如損之莊公曰吾姑候其斃焉古者不以私害公不以政假人不以小忍亂大謀莊公以私害公以政假人以小忍亂

大謀昉乎段之亂鄭者莊公為之也鄆鄭地也其曰于鄆何于鄆遠矣猶曰取之其母之懷中而殺之云爾秋七月天王使宰咺來歸惠公仲子之賵宰者何氏也咺者何名也何以名上士也有上士有中士有下士上士三命中士再命下士一命惠公仲子者何惠公之母也母何以不稱夫人妾母也其言惠公仲子何母以子貴也母以子貴者何庶子君為其母立廟使公子祭之於子祭於孫止賵者何車馬曰賵衣衾曰襚貝玉曰含貨財曰賻天王使宰咺來歸惠公仲子之賵何以書譏何譏爾妾母而天子賵之非正也九月及宋人盟于宿孰及之卑者之盟不志及之

者公也公則曷為不言公恥與宋人盟也曷為恥與宋人盟大國之卿可以會小國之君小國之卿不可以會次國之君卑者孰謂謂下士也冬十有二月祭伯來祭伯者何襄內諸侯也祭邑也伯爵也天子上大夫也何以不稱使朝也朝則何為不言朝不與朝也曷為不與內諸侯不外交外諸侯不內交有至尊在不貳之也公子益師卒傳曰公子曰公子公子之子曰公孫公孫之子以王父字為氏公子之尊視大夫大夫三命然後氏死則卒之公子益師卒正也二年春公會戎于潛戎者何戎之君也曷為不以其君稱之不與君稱也曷為不與君稱正朔不加禮樂

不及朝聘不與東方曰夷南方曰蠻西方曰戎北方曰狄雖大皆曰子有故也然後著其名爵外之也曷為外之王者內京師而外諸夏內諸夏而外夷狄公會戎于潛非正也夏五月莒人入向入者何入其國也無駭帥師入極無駭者何吾大夫也何以不氏再命也諸侯大國三卿皆命于天子次國三卿二卿命于天子小國三卿一卿命于天子大國之卿三命次國再命小國一命禮也曷為或言帥師或不言帥師將尊師眾稱某帥師將尊師少稱將將卑師眾稱師將卑師少稱人極者何國也秋八月庚辰公及戎盟于唐九月紀裂繻來逆女裂繻者何紀大夫也何以

不稱使不與紀侯使也曷為不與紀侯使逆女親之者也使大夫非禮也哀公問曰冕而親迎不已重乎孔子對曰合二姓之好以繼先聖之後以為宗廟社稷主何謂已重乎女曷為或稱女或稱婦或稱夫人在其國稱女在塗稱婦入國稱夫人冬十月伯姬歸于紀婦人謂嫁曰歸歸于諸侯則爵同尊同則志紀子帛莒子盟于密子帛者何裂繻之字也何以字褒之也曷為褒之為其與莒子盟也與莒子盟則曷為褒之莒人魯人相與有仇莒子將伐魯裂繻知其謀也道與莒子言而平之莒子為是盟故若裂繻可謂忠矣大夫不憂諸侯此其為忠奈何昏因之道也

大夫在境外有可以尊國家利社稷則專之諸侯不專社稷十有二月乙卯夫人子氏薨夫人子氏者何隱公之母也何以不書葬不以夫人葬也何為不以夫人葬公欲不終為君亦不以子氏為夫人也亦不以子氏為夫人則其曰夫人子氏薨何臣子辭也鄭人伐衛

三年春王二月己巳日有食之何以書記異也何異爾日有食之君避寢瞽奏鼓嗇夫馳庶人走以昭事神訓民事君曷為或日或不日或言朔或不言朔史之記失也非史之記失則日有食之不得其正也正者何日有食之於朔正也不於朔失也失則春秋何以弗革弗可得革也春秋之作也子曰其事齊桓晉文其文則史其義則丘竊取之矣三月庚戌天王崩何以不書葬天子記崩不記葬其義舉天下而葬一人不疑也諸侯記卒記葬有天子存不必得其時也曷為或言崩或言薨天子曰崩諸侯曰薨大夫曰卒士曰不祿夏四月辛卯尹氏卒尹氏者何天子之大夫也其稱尹氏何貶曷為貶世卿也古者寰外諸侯嗣寰內諸侯祿外大夫不卒此何以卒嘗主乎我也


秋武氏子來求賻武氏子者何天子之大夫也其稱武氏子何譏何譏爾父卒子未命也何以不稱使非王命也曷為非王命當喪未君也嗣子定位於初喪

則其曰未君何百官總已以聽於冢宰三年武氏子
 來求賻何以書譏何譏爾喪事無求求賻非禮也蓋
 通乎下歸死者曰賻歸生者曰賻歸之者正也求之
 者非正也交譏之八月庚辰宋公和卒冬十有二月
 齊侯鄭伯盟于石門何以書盟會之事告則書盟會
 之事曷為告則書常事不書非常則書盟會於春秋
 常也於王者非常也殷人作會而民始畔周人作誓
 而民始疑癸未葬宋穆公諸侯曷為或卒或不卒或
 葬或不葬卒自外錄也葬自內錄也不卒非外也不
 葬非內也葬者臣子之事也國滅不葬無臣子也君
 弑賊不討不葬亦無臣子也

四年春王二月莒人伐杞取牟婁牟婁者何杞之邑
 也戊申衛州吁弑其君完州吁者何衛公子也何以
 不稱公子公子雖貴非三命不氏公子之重視大夫
 夏公及宋公遇于清遇者何不期也宋公陳侯蔡人
 衛人伐鄭秋翬師師會宋公陳侯蔡人衛人伐鄭曷
 為或會言伐或及言伐會者聚辭也及者繼辭也九
 月衛人殺州吁于濮傳曰石碏殺之石碏殺之則其
 稱人何討賊之辭也衛莊公娶于齊曰莊姜無子其
 媵曰戴嬀生桓公完完無寵州吁者嬀人之子也勇
 而好兵莊公愛之石碏諫曰古之愛子者教以義方
 弗納於邪驕奢淫泆所自邪也四者之來寵祿過也

夫寵而不驕驕而能降降而不憾憾而能已者寡與故不以賤妨貴不以少陵長不以小加大不以淫破義莊公弗聽莊公死桓公立州吁弑桓公乃自立也於是州吁如陳石碻使告於陳曰衛國褊小老夫耄矣無能為也州吁實弑寡君敢即圖之陳人為之執州吁而請涖于衛衛人殺之于濮冬十有二月衛人立晉晉者何公子晉也立者何立者不宜立也其稱人何眾之所欲立也眾之所欲立則其曰不宜立何眾知晉之可以立不知立君之非眾石碻知晉之得乎眾可以為君不知立晉之非己是以謂之不宜立也


五年春公觀魚于棠何以書譏何譏爾觀魚非事也隱公將觀魚公子彊諫曰凡物不足以講大事其材不足以備器用則君不舉焉君者納民於軌物者也講事以度軌量謂之軌取材以章物采謂之物非此二者謂之亂政故春蒐夏苗秋獮冬狩出而治兵入而振旅以考軍實昭文章明貴賤辨等列順少長習威儀而已矣鳥獸之肉不登於俎皮革齒牙骨角毛羽不登於器則公不射也若夫山林川澤之實器用之資皂隸之事官司之守君所不及焉隱公弗聽棠者何齊上之邑也夏四月葬衛桓公秋衛師入郕九月考仲子之宮考宮者何成宮而祭也仲子者何惠



公之母也何以不言惠公仲子內外辭也考仲子之
 宮正乎不正乎庶子君為其母廟使公子祭之於子
 祭於孫止隱孫也而祭仲子非正也父卒而後為祖
 後者為祖母三年仲子不得祭於子而祭於孫亡乎
 禮者之禮而可以義起者也五年而後廟蓋天子命
 之初獻六羽六羽何六佾也獻之者何舞之於仲子
 之宮也其言初何自是始僭也孰僭僭諸公也天子
 八佾諸公六佾諸侯四佾魯祭周公用八佾祭魯公
 用六佾祭羣公用四佾初獻六羽以其可言言之也
 其不可言諱也考仲子之宮將萬焉有司疑公問羽
 數於眾仲眾仲對曰天子八佾諸侯六佾大夫四士

二夫舞所以節八音行八風也故自八以下魯人行
 之六佾之僭自眾仲始也邾人鄭人伐宋螟何以書
 記災也冬十有二月辛巳公子彊卒宋人伐鄭圍長
 葛

六年春鄭人來輸平輸平者何輸平猶致成也曷為
 致成為伐鄭故致成也狐壤之戰隱公獲焉然則何
 致致禘田也致禘田矣何以不曰暨鄭平猶未得乎
 與鄭平也曷為未得乎與鄭平鄭人以口請之矣而
 未入也其曰來使人也其曰輸有挾也平不言來輸
 來輸未得乎平也然則何以不曰鄭人來輸禘言平
 則禘見言禘則平不見夏五月辛酉公會齊侯盟于



艾秋七月此無事何以書春秋雖無事者時過則書首時過則何以書春秋編年四時具然後為年冬宋人取長葛此鄭長葛也曷為不繫之鄭疾之也曷為疾之更年而取邑賀矣非也

七年春王三月叔姬歸于紀不言逆之者何也親逆之也親逆之則曷為不言親逆之常事不書有非常然後書滕侯卒諸侯卒曷為或名或不名或赴以名或不赴以名諸侯曷為或赴以名或不赴以名赴以名禮也不赴以名非禮也天王崩赴以爵諸侯薨赴以名會盟朝聘之事存焉以慎終繼世是故諸侯不生名夏城中丘中丘者何內之邑也何以書以重書

也齊侯使其弟年來聘其稱弟何母弟也母弟稱弟母兄稱兄諸侯之尊弟兄不得以屬通其弟云者凡以重書也何重乎齊侯之弟古者年四十而仕五十而爵天下無生而貴者齊侯愛其弟未可爵而爵之亟交於諸侯卒之其子弒齊君而亂齊國是以君子重焉爾秋公伐邾冬天王使凡伯來聘戎伐凡伯于楚丘以歸國而曰伐此凡伯之身也其言伐何大天子之使也執以小而伐以大以一人當一國大天子之使也為天子使尊矣而屈卑乎戎狄可言伐不可言執是亦大天子之使也

八年春宋公衛侯遇于垂何以書接乎我也我未有

接之也其曰接乎我何諸侯有過於我者雖無事為必以禮交之道也餽牽云乎芻米云乎垂者何吾近邑也三月鄭伯使宛來歸祊庚寅我入祊未有言我入者其曰我入祊何祊非我有也何言乎祊非我有王者制諸侯之地也有常鄭不得與諸人魯不得取諸人平者義也入祊者利也不正其以利為義夫苟以利為義者亦必以利廢義君子恥之夏六月己亥蔡侯考父卒辛亥宿男卒秋七月庚午宋公齊侯衛侯盟於瓦屋八月葬蔡宣公九月辛卯公及莒人盟于浮來莒人微者也公曷為與乎莒之微者而盟公欲之也何用見公欲之也公與大夫盟沒公以其不

沒公知其欲之也非公之輕南面而下與大夫盟也螟冬十有二月無駭卒

九年春天王使南季來聘南者何氏也季者何字也何為字下大夫也天子之下大夫四命聘者何問也諸侯時朝乎天子以致敬也天子時聘乎諸侯以致愛也聘禮受於廟北面再拜稽首朝何以不書而聘何以書記異也聘者不常也三月癸酉大雨震電何以書記異也何異爾不時也庚辰大雨雪何以書記異也何異爾倣甚也挾卒挾者何吾大夫也曷為或卒或不卒正大夫也則卒之非正大夫也則不卒之公子翬如齊逆女亦正大夫也何以不卒貶曷為

貶與弒公也其與弒公奈何隱公將致國乎桓公子
 翬諂乎隱公謂隱公曰百姓安子諸侯說子盍終為
 君矣隱公曰不可吾既許之反國焉吾立於此徒攝
 而已矣吾營菟裘之地而歸老焉公子翬恐其言若
 聞乎桓者於是謂桓曰吾已為子嘗君矣君不反國
 也盍求之乎自是相與謀而弒隱公夏城郎秋七月
 冬公會齊侯于防

十年春王二月公會齊侯鄭伯于中丘夏翬帥師會
 齊人鄭人伐宋六月壬戌公敗宋師于菅曷為或言
 戰或不言戰皆陳曰戰詐戰曰敗辛未取郟辛巳取
 防秋宋人衛人入鄭宋人蔡人衛人伐戴鄭伯伐取
 之戴者何附庸之國也何用知其附庸之國也以其
 不言滅之而言取之曷為不言滅之而言取之附庸
 者不成國也滅國曰滅取附庸曰取其言鄭伯伐取
 之何甚之之辭也利人之暴乘人之危是以無親於
 天下冬十月壬午齊人鄭人入郟

十有一年春滕侯薛侯來朝其言朝何王者之制諸
 侯歲相問殷相聘世相朝其兼言之何譏何譏爾旅
 見也非天子不旅見諸侯諸侯相旅見非禮也朝者
 考禮正刑一德以尊天子也不得有德而朝之雖不
 旅見亦非禮也夏公會鄭伯于時來秋七月壬午公
 及齊侯鄭伯入許冬十有一月壬辰公薨何以不地

三百六十五
春秋劉氏傳第一
弑也弑則何以不言弑不忍言也臣弑君凡在官者
殺無赦子弑父凡在官者殺無赦以謂人道所未有
也人道所未有是以不忍言也何以不書葬賊未討
也賊未討則何以不書葬君弑臣討賊猶親弑子復
讎也讎不復則不葬不葬則服不除寢苦枕戈所以
明為臣子也葬者臣子之終事也其義未終故不敢
以急葬也

春秋劉氏傳第一

後學 成德 校訂

春秋劉氏傳第二

桓公

元年春王正月公即位繼弑君不言即位此其言即
何如其意也三月公會鄭伯于垂鄭伯以辭假許田
其言假之何易之也易之則曷為謂之假為恭也曷
為為恭有天子存則諸侯不得專地也許田者何魯
湯沐之邑也方伯時朝乎天子天子必賜之湯沐之
邑於縣內視元士魯非方伯也其謂之方伯何自陝
而東者周公主之自陝而西者召公主之許田之為
魯自周公始焉易之者我也使其辭若自鄭出然是
亦為之諱也此蓋邑也其稱田何田多邑少稱田邑
多田少稱邑夏四月丁未公及鄭伯盟于越秋大水

何以書記災也冬十月

二年春王正月戊申宋督弒其君與夷及其大夫孔父及者何累也弒君多矣舍此無累者乎曰有仇牧荀息皆累也舍仇牧荀息無累者乎曰有則此何以書賢也何賢乎孔父孔父可謂處命不渝矣孔父之處命不渝奈何宋宣公舍與夷而讓穆公穆公將死召大司馬孔父而屬之曰先君舍其子以命寡人寡人不敢忘苟以大夫之靈得保首領以沒于地先君若問與夷也其將何辭以對大夫其奉之以主社稷矣孔父復曰羣臣皆願奉馮也穆公曰不可先君以寡人為賢使主社稷若弃德不讓是廢先君之舉

矣豈曰能賢逐其太子馮出居于鄭曰爾為吾子生毋相見死毋相哭穆公死殤公立殤公好戰十年而十二戰國人苦之督將弒殤公以納馮孔父生而存則殤公不可得而弒也故於是先攻孔父之家殤公知孔父死已必死趨而救之皆死焉孔父之智則眾孔父之忠則盡矣託六尺之孤寄百里之命知必死而不避孔父可謂處命不渝矣春秋賢者不名孔父者所賢也則其名之何父前子名君前臣名滕子來朝三月公會齊侯陳侯鄭伯于稷以成宋亂成之者何成之者平之也平之則曷為不言平之保人之賊私人之賂制人之上下謂之成亂則可謂之平亂則

不可夏四月取郜大鼎于宋此取之宋其謂之郜大鼎何郜所守之大鼎也武王克商封諸侯班宗彝以為子孫藏郜以不義失之宋以不義得之雖久非其有也故謂之郜大鼎戊申納于大廟何以書譏何譏爾遂亂受賂納于太廟非禮也臧哀伯諫曰君人者將昭德塞違以臨照百官猶懼或失之故昭令德以示子孫是以清廟茅屋大路越席大羹不致粢食不鑿昭其儉也衮冕黻珽帶裳幅舄衡紃紕紕昭其度也藻率鞞鞶厲游纓昭其數也火龍黼黻昭其文也五色比象昭其物也錫鸞和鈴昭其聲也三辰旂旗昭其明也夫德儉而有度登降有數文物以紀之

聲明以發之以臨照百官百官於是戒懼而不敢易紀律今滅德立違又取其賂器以納于太廟明示百官百官象之其可誅乎桓公弗聽秋七月紀侯來朝蔡侯鄭伯會于鄧九月入杞公及戎盟于唐冬公至自唐曷為或致或不致禮也不致非禮也致何以禮不致何以非禮君行必告于廟反必奠而後入上同之

三年春正月公會齊侯于贏何以不書王桓無王也桓何以無王桓不受命於王也諸侯喪畢以士服見天子未受命不敢服其服也已見天子賜之黻冕圭璧然後服歸設奠於祖廟然後臨諸臣桓內弒其君

外成人之亂弱天子而不受命則固無王也不書王見不受命也不受命雖久不得為諸侯君子賤之二年有王未畢喪也夏齊侯衛侯晉命于蒲晉命者何相命也何言乎相命古者有方伯有州牧有卒正有連率命於天子正也諸侯自相命非正也齊大公之後東州之侯也衛康叔之後北州之侯也以事相命也六月公會杞侯于郕秋七月壬辰朔日有食之既既者何盡也公子翬如齊逆女九月齊侯送姜氏于謹何以書譏何譏爾送女者父不下堂母不出祭門兄弟庶母不出闕門父命之曰戒之敬之夙夜毋違命母施衿結帨曰勉之敬之夙夜毋違宮事庶母施


擊申之曰敬恭聽宗爾父母之言夙夜毋愆視諸衿擊送女越竟非禮也此入國矣何以不稱夫人未見廟猶未入國也公會齊侯于謹夫人姜氏至自齊翬何以不致公親受之于齊侯也冬齊侯使其弟年來聘有年有年何以書以喜書也何喜乎有年六穀皆登為有年

四年春正月公狩于郎狩者何田狩也春曰蒐夏曰苗秋曰獮冬曰狩常事不書此何以書非其時書非其地書四時曷為必田狩春教振旅辨鼓鐸火弊以獻社夏教芟舍辨號名車弊以獻禘秋教治兵辨旗物羅弊以獻禘冬教大閱總軍實徒弊以獻烝夏天

王使宰渠伯糾來聘宰者何官也天子之宰也天子之宰通乎天下渠伯者何爵也糾者何名也天子大夫不名其曰宰渠伯糾何譏何譏爾桓內弑君外成人之亂又不受命王弗能討也而聘之是崇亂也參譏之

五年春正月甲戌此無事何以無無聞焉爾或曰陳侯之弟佗殺陳世子免云爾闕也已丑陳侯鮑卒夏齊侯鄭伯如紀外相如不書此何以書疾之也曷為疾之齊侯鄭伯將襲紀以朝往焉紀人知之然後以朝反如者朝辭也尊不朝乎卑大不朝乎小強不朝乎弱不正其為詐以圖人之國使若誠朝然疾之也

天王使仍叔之子來聘仍叔之子者何猶曰仍叔之子云爾爵人以其德也祿人以其能也天下之公也王者不以愛害公葬陳桓公城祝丘秋蔡人衛人陳人從王伐鄭其言從王伐鄭何從王正也大雩雩者何旱祭也其言大何大雩非諸侯之雩也曷為非諸侯之雩天子雩主上帝諸侯雩主星辰山川魯王禮也祀上帝魯何以王禮昔者武王崩成王幼周公相成王攝天下七年制禮作樂頒度量而天下大服成王嘉之以周公為有勲勞故賜之大祭祀天子禮樂以廣魯於天下然則禮與曰非禮也天子祭天諸侯祭土諸侯祭土者唯王者後焉曷為或言雩或言旱



或旱而雩或旱而不雩旱而雩禮也旱而不雩非禮也雩而雨則言雩雩而不雨則不言雩螽何以書記災也冬州公如曹州公者何寰內諸侯也外相如不書此何以書過我也過我則何以書接焉爾

六年春正月寔來寔來者孰謂謂州公也曷為不曰州公來簡之也曷為簡之受命而如曹廢命而塗魯來者來朝也不言朝不與朝也大夫以君命出言不宿喪不奔死不反公事無私敬交譏之夏四月公會紀侯于成秋八月壬午大閱何以書譏何譏爾不時也大閱之禮虞人萊野百步一表以旗致民選車徒命旗物辨鼓鐸會器械三鼓而行三鼓而趨三鼓而走不用命者殺無赦置旌以為左右和車徒敘和表貉獲禽不越遂不面傷大獸公之小獸私之冬事也秋興之非正也厲農甚矣蔡人殺陳佗稱人以殺何討賊之辭也此蔡人也其以討賊言之何與之也曷為與之上無天子下無方伯天下諸侯有為無道孽亂宗賤害貴者義能討之則討之可也九月丁卯子同生子同生者孰謂謂莊公也何以書貴也何貴爾世子也古者世子生告于君接以大牢宰掌具三日卜士負之吉者宿齊朝服寢門外詩負之射人以桑弧蓬矢六射天地四方保受乃負之宰醴負子賜以束帛卜士之妻大夫之妾使食之三月而名之遂以

走不用命者殺無赦置旌以為左右和車徒敘和表貉獲禽不越遂不面傷大獸公之小獸私之冬事也秋興之非正也厲農甚矣蔡人殺陳佗稱人以殺何討賊之辭也此蔡人也其以討賊言之何與之也曷為與之上無天子下無方伯天下諸侯有為無道孽亂宗賤害貴者義能討之則討之可也九月丁卯子同生子同生者孰謂謂莊公也何以書貴也何貴爾世子也古者世子生告于君接以大牢宰掌具三日卜士負之吉者宿齊朝服寢門外詩負之射人以桑弧蓬矢六射天地四方保受乃負之宰醴負子賜以束帛卜士之妻大夫之妾使食之三月而名之遂以

名于宗廟社稷山川大夫士之子不敢與世子同名
世子生之禮也此世子也其不曰世子何天下無生
而貴者誓於天子然後為世子冬紀侯來朝

七年春二月己亥焚咸丘焚咸丘者何以火田也以
火田則其曰焚咸丘何火田而咸丘焚也何以書譏
何譏爾焚咸丘疾矣夏穀伯綏來朝鄧侯吾離來朝

此同時其特言之何同時而特言之者特見之者也
何以名貶曷為貶用夷禮也
八年春正月己卯烝烝者何冬祭也春曰祠夏曰禘

秋曰嘗冬曰烝常事不書此何以書譏何譏爾譏亟
也亟則黷黷則不敬疎則怠怠則忘君子之祭也敬
而不黷思而不怠此未有言烝者其謂之亟何以夏

五月為亟也天王使家父來聘夏五月丁丑烝秋伐
邾冬十月雨雪何以書記異也何異爾不時也祭公
來遂逆王后于紀祭公者何天子之三公也何以不

言使不予天子之使祭公也曷為不予天子之使祭
公三公者父師之任也坐而論道使三公以逆女非
正也祭公逆王后于紀則曷為來田乎我使我主其

禮也曷為使我主其禮昏因之事必有嘉讓之辭焉
太上無敵不可以質惟諸侯同姓者主之遂者何生
事也大夫無遂事遂而非禮非也此其為非禮奈何
使我主之紀有成矣自是往逆也



九年春紀季姜歸于京師其言季姜何未可以稱王
 后也稱王后矣曷為未可以稱王后自往者言之王
 者無舛王命之斯后矣自來者言之王雖有命未見
 宗廟則不敢處也不敢處恭也京師者何天子之居
 也京者何大也師者何衆也天子之居必以衆大之
 辭言之夏四月秋七月冬曹伯使其世子射姑來朝
 諸侯相見曰朝此世子也其言朝何參譏之曷為參
 譏之世子子也伉諸侯之禮而來朝曹伯失正矣朝
 之禮以待人父待人之子內失正矣曹伯失正內失
 正世子可以已矣則是故命也尸子曰夫已乎多道
 十年春王正月桓無王其曰王何也存公也何謂存

公三朝之節也古者有侯服有甸服有男服有采服
 有衛服侯服一歲一見甸服二歲一見男服三歲一
 見采服四歲一見衛服五歲一見魯采服也古者一
 不朝則貶其爵再不朝則削其地三不朝則六師移
 之桓非受命之君也三不朝矣其曰王存公也庚申
 曹伯終生卒夏五月葬曹桓公秋公會衛侯于桃丘
 弗遇弗遇者何公不及遇也公不及遇者何公後會
 也曷為或言不或言弗不者正辭也弗者遷辭也君
 子之於言無所苟而已矣冬十有二月丙午齊侯衛
 侯鄭伯來戰于郎其言來戰何來戰者外為志乎戰
 也何以不言師敗績戰而不言師敗績者敗在內也



敗在內則何以不言恥也

十有一年春正月齊人衛人鄭人盟于惡曹此大國也皆微者乎非微者也微者之盟不志非微者則其稱人何大夫之交盟於中國自此始故貶之也盟會者君之禮也非臣之禮也大夫之交盟於中國眾矣何為獨貶乎此盡貶之則不可勝貶故於其始一貶焉其餘從同同夏五月癸未鄭伯寤生卒秋七月葬鄭莊公九月宋人執鄭祭仲曷為或稱人以執或稱侯以執稱侯以執者伯討也稱人以執者非伯討也宋人執鄭祭仲其為非伯討奈何鄭莊公娶于鄧生太子曰忽又娶于宋生庶子曰突祭仲者鄭之相也

莊公死太子即位宋公誘祭仲而執之曰為我出忽而立突不然則死祭仲許之出忽而立突突歸于鄭此鄭突也曷為不繫之鄭貶曷為貶鄭非突之所可號歸非突之所可名歸非突之所可名則其曰突歸于鄭何病祭仲也祭仲之為人臣也處則不能守出則不能權貪生而好勢廢正以立亂曰突歸于鄭者見突之挈乎祭仲者也歸者順辭也有易辭焉非所順而書歸易也入者逆辭也有難辭焉非所逆而書入難也突之易見祭仲之挈也交惡之鄭忽出奔衛此鄭子也何以名貶曷為貶忽不子也忽不子者何遠君子近小人不能與賢者圖事權臣擅命放乎五

世亂鄭者忽失為子之道也柔會宋公陳侯蔡叔盟于折柔者何內大夫也公會宋公于夫鍾冬十有二月公會宋公于闕

十有二年春正月夏六月壬寅公會杞侯莒子盟于曲池秋七月丁亥公會宋公燕人盟于穀丘傳曰燕南燕也八月壬辰陳侯躍卒公會宋公于虛冬十有一月公會宋公于龜丙戌公會鄭伯盟于武父丙戌衛侯晉卒曷為再曰春秋故史也有所不革子曰其事齊桓晉文其文則史其義則丘竊取之矣十有二月及鄭師伐宋丁未戰于宋孰及之公也戰者曷為或言公或不言公戰而勝則言公言敗戰而不勝則不言公不言敗戰而敵則言公而不言敗此戰也其言伐何辟嫌也惡乎嫌嫌與鄭人戰也

十有三年春二月公會紀侯鄭伯已巳及齊侯宋公衛侯燕人戰何以不地地國也燕人者燕師也其稱人何貶曷為貶燕非會盟之侯也賣信而怙怨是亂而已矣蓋自是國非其國也齊師宋師衛師燕師敗績三月葬衛宣公葬自內錄也君子怨不弃義怒不廢禮惡不忘親夏大水秋七月冬十月

十有四年春正月公會鄭伯于曹無冰何以書記異也夏五鄭伯使其弟語來盟夏五何以不益疑也春秋信以傳信疑以傳疑秋八月壬申御廩災御廩者何

采盛委之所藏也天子親耕千畝諸侯親耕百畝
 以共采盛王后親蠶北郊夫人親蠶西郊以共祭服
 國非無良農工女也以謂以人之所盡事其祖禰不
 若以已所自親者也災者火也其謂之災何也猶曰
 天戒之鬼神害之云爾乙亥嘗何以書譏何譏爾不
 時也時為大順次之體次之宜次之稱次之冬十有
 二月丁巳齊侯祿父卒宋人以齊人蔡人衛人陳人
 伐鄭以者何行其意也貴則行乎賤大則行乎小眾
 則行乎寡此皆微者也其言以何宋公也宋公則其
 稱人何貶曷為貶君之伐國者不斬祀不殺厲不堙
 井正之而已矣宋公伐鄭殘其郊牧焚其城郭隳其
 大宮取其椽以歸為盧門之椽是暴而已矣大宮者
 何厲王之宮也厲王之宮鄭惡乎得有之鄭祖厲王
 而非禮之正也

十有五年春二月天王使家父來求車何以書譏何
 譏爾王者無求求車非禮也三月乙未天王崩夏四
 月己巳葬齊僖公五月鄭伯突出奔蔡突何以名奔
 而名者見有君也忽未父則其曰有君何忽雖未入
 國固其國也鄭世子忽復歸于鄭君存稱世子君薨
 稱子某君既沒其稱世子何君沒而稱世子者正疑
 乎不正君子與之繼世焉世子猶世世子也曷為或
 言復歸或不言復歸復歸有二道有諸侯之歸有大

夫之歸諸侯歸可言復大夫歸不可言復諸侯何以
 可言復大夫何以不可言復諸侯世國故可以復大
 夫不世官故不可以復諸侯之言復者位未絕復可
 也大夫之言復者位絕矣復不可也諸侯位雖未絕
 歸而不言復已絕者也大夫位雖已絕入而不言復
 未絕者也忽之為可復奈何正也許叔入于許許叔
 者何許公子也何以字賢也何賢爾宜為君也宜為
 君則其稱入何難也何難焉爾鄭幾滅之迫其亂而
 後能入也公會齊侯于艾邾人牟人葛人來朝此皆
 君也其稱人何貶曷為貶諸侯旅見天子之禮也蓋
 以謂死天子而叛京師乃可以至焉秋九月鄭伯突

入于櫟冬十有一月公會宋公衛侯陳侯于袤伐鄭
 十有六年春正月公會宋公蔡侯衛侯于曹夏四月
 公會宋公衛侯陳侯蔡侯伐鄭傳曰伐鄭以納突也
 伐鄭以納突則何以不曰納鄭伯于鄭不與納也曷
 為不與納諸侯失國諸侯納之正也有其實者居其
 名無其實者不得居其名有其名者享其功無其名
 者不得享其功納突非正也秋七月公至自伐鄭冬
 城向十有一月衛侯朔出奔齊朔何以名奔而名者
 見有君也孰君公子黔牟也公子黔牟曷為者也衛
 宣公之太子曰伋娶于齊而美宣公取之生壽及朔
 焉朔惡伋之為太子也構伋於公公使伋之齊而使



盜待諸莘且殺之壽知而告之使行曰不可弃父之命惡用子矣有無父之國則可也壽於是載其旌以先盜殺壽既而及至曰我之求也此何罪請殺我乎又殺之宣公死朔即位國人怨朔之殺二公子故於是逐朔而立黔牟

十有七年春正月丙辰公會齊侯紀侯盟于黃二月丙午公會邾儀父盟于雒夏五月丙午及齊師戰于奚六月丁丑蔡侯封人卒秋八月蔡季自陳歸于蔡蔡季者何蔡侯之弟也何以稱字賢也何賢爾其去也以道其反也以禮公子不去國何賢乎季之去權也權者反於經而後有善焉行權有道自貶損以行權不害人以行權若季者道足以與權而不亂力足以得國而不居遠而不攜邇而不偏者也其言自陳何陳有力焉爾癸巳葬蔡桓侯葬者稱公此其稱爵何稱爵禮也稱公非禮也稱爵何以禮稱公何以非禮稱爵者誅之于天子者也稱公者非誅之于天子者也賤不誅貴幼不誅長天子崩誅於郊諸侯薨誅於王大夫卒誅於君生無爵者死無諡生有爵者死有諡孔子曰諸侯相誅非禮也及宋人衛人伐邾冬十月朔日有食之

十有八年春王正月公會齊侯于灤公夫人姜氏遂如齊何以不言及夫人伉也猶曰匹夫匹婦之相與

云爾自禍之道也桓公既會齊侯于濼遂與夫人如齊申綸諫曰不可臣聞女有家男有室無相瀆也謂之有禮易此必敗君其舍夫人乎桓公弗聽夫人果通於齊侯桓公知之謫而疏之齊侯怒為是饗公既饗而出使公子彭生乘公摺而殺之豎曼曰彭生其免乎賢者死忠以振疑百姓寓焉智者究理而長慮身得免焉彭生貳於君無盡言而謾行以戲君使君失親戚之禮命又力成其禍以構二國之怨禍理屬焉夏四月丙子公薨于齊丁酉公之喪至自齊秋七月冬十有二月己丑葬我君桓公賊未討何以書葬討之矣未有言討之者其曰討之何桓公薨於車魯人知彭生之為而莫知夫人之為也告於齊曰寡君畏君之威不敢寧居來修舊好禮成而不反無所歸咎惡於諸侯請得彭生除之齊人殺彭生葬桓公桓公既葬三月魯人徐知夫人之為也夫人懼自是走之齊

春秋劉氏傳第二

後學 成德 校訂

春秋劉氏傳第三

莊公上

元年春王正月公何以不言即位春秋君弒子不言
 即位君弒則子何以不言即位授受之道也先君不
 以其道終則子不忍即位焉先君不以其道終而子
 即位是無恩於先君也三月夫人孫于齊孫者何奔
 也內諱奔謂之孫夫人何以不稱姜氏絕之也絕之
 奈何夫人與於弒者不可以入宗廟人之於天也以
 道受命於人也以言受命不若於道者天絕之也不
 若於言者人絕之也臣子大受命夏單伯逆王姬單
 伯者何孤也孤者曷謂謂附庸之君也附庸之君則
 曷為謂之孤附庸之君執人國者謂之孤曷為字之

通志堂

貴也何以不稱使不與使也曷為不與使躬君弑於
 齊而使之主昏因非禮也君子以其可辭而弗受也
 其弗辭而受以是為非禮也秋築王姬之館于外何
 以書譏何譏爾築王姬之館于外非禮也築王姬之
 館于外則何以非禮天子嫁女乎諸侯必使諸侯同
 姓者主之諸侯嫁女乎大夫必使大夫同姓者主之
 主嫁女者必自其廟仇讎之人非所以接昏因也衰
 麻之服非所以接弁冕也如辭而已矣築王姬之館
 于外非禮也冬十月乙亥陳侯林卒王使榮叔來錫
 桓公命錫命者何命為諸侯也諸侯非受命則不成
 為君桓內弑其兄外不朝王終身不受非諸侯也故
 桓與王生不能討死追命之非王義也故王無天桓
 無正王無天君子見法焉王姬歸于齊不言逆之何
 親逆之也親逆之則何為不言親逆之常事不書有
 非常然後書齊師遷紀邾鄆邾邾邾者何紀之邑
 也

二年春王二月葬陳莊公夏公子慶父帥師伐於餘
 丘於餘丘者何國也秋七月齊王姬卒外夫人不卒
 此何以卒喪之也曷為喪之我主之故喪之齊告王
 姬之喪莊公為之大功姊妹之服也冬十有二月夫
 人姜氏會齊侯于禚何以書譏何譏爾婦人無外事
 送迎不出門見兄弟不過國婦人不事行未嫁從父

既嫁從夫夫死從子夫人姜氏會齊侯于禚非禮也
以公為不能防閑其母失子之道焉參譏之乙酉宋
公馮卒

三年春王正月溺會齊師伐衛夏四月葬宋莊公五
月葬桓王崩久矣曷為於此而葬慢也慢者何天子
七月而葬同軌至諸侯五月而葬同盟至大夫三月
而葬同位至士踰月而葬外姻至王崩曷為或言葬
或不言葬葬自內錄者也公親會之則不言葬不言
葬者常也公不親會則言葬言葬者非常也葬天王
大禮也曷為以常言之蓋以謂子事親臣事君之道
焉秋紀季以鄆入于齊紀季者何紀侯之弟也何以

不曰紀侯之弟言以鄆為附庸于齊也紀季曷為以
鄆為附庸于齊齊將滅紀紀侯以道事之則不得免
焉因不忍鬪其民也逡巡有去志紀季用是以鄆入
于齊復五廟焉然則予之乎予之也何用見其予之
也其字而不名入而不畔是予之也予之則其言入
何難也何難焉爾析地以去國降志以事雖是非季
之心也以宗國為寄矣冬公次于滑次者何止也曷
為或以事書或不以事書以事書者止之以事者也
不以事書者止之不以事者也君舉於政師舉於義
止不以事者亂之道也

四年春王二月夫人姜氏享齊侯于祝丘享者何兩

君之禮也兩君相見享于廟中夫人與在焉禮也非
 兩君相見去其國而享諸侯非禮也為之名而已矣
 三月紀伯姬卒夏齊侯陳侯鄭伯遇于垂紀侯大去
 其國大去其國者何出奔不復出奔不復則其曰大
 去其國何不使紀侯有奔之名也為不使紀侯有
 奔之名紀侯者仁人也不以所用養人者害人以謂
 雖大王之道不過焉然則紀滅乎紀滅矣滅則其不
 言滅何以其未至乎滅而去也已滅而失是逃也非
 大正之道也六月己丑齊侯葬紀伯姬滅國不葬紀
 已滅矣其言葬紀伯姬何以齊侯之葬之著焉也齊
 侯滅紀則曷為葬其夫人為說也葬臣子之事也斥
 言齊侯而葬伯姬甚賤之也然則其為說奈何曰逐
 人之君而取其國為非所為以求媚說者也秋七月
 冬公及齊人狩于禚齊人者何齊之微者也此齊之
 微者其言公及之何譏何譏爾非公之去南面而下
 與微者狩也

五年春王正月夏夫人姜氏如齊師秋邠犁來來朝
 邠者何小邾也小邾則曷為謂之邠未成國謂之邠
 既成國謂之小邾犁來者何其名也何以名貶曷為
 貶用夷禮也冬公會齊人宋人陳人蔡人伐衛傳曰
 伐衛以納朔也伐衛以納朔則曷為不言納衛侯朔
 不與納也曷為不與納諸侯失國諸侯納之正也有

其實者居其名無其實者不得居其名有其名者享其功無其名者不得享其功納朝非正也納朝何以非正天子命黔牟矣

六年春王正月王人子突救衛王人者何微者也子突者何字也曷為字貴之也曷為貴之以其任之重貴之也任之重則曷為貴之諸侯亂命納衛侯朝君子曰子突見正焉夏六月衛侯朝入于衛何以名絕曷為絕殺世子伋篡公子黔牟入者何逆辭也此復也何以不曰復復而言復者其可復者也復而不言復者道能復之不可復者也秋公至自伐衛螟冬齊人來歸衛寶衛寶者何衛之寶也古者分同姓以寶

玉展親分異姓以遠方之職貢使無忘服此衛之寶則齊人曷為來歸之齊以不義取之衛以不義失之公之納朝也力故齊人歸于我也

七年春夫人姜氏會齊侯于防夏四月辛卯夜恒星不見夜中星隕如雨恒星者何列星也如雨者何如雨者非雨也非雨則曷為謂之如雨言衆多不可為數也自上下者謂之隕自下上者謂之雨何以書記異也秋大水無麥苗曷為先言麥而後言苗麥苗同時麥成而先敗也何以書記災也冬夫人姜氏會齊侯于穀

八年春王正月師次于郎以俟陳人蔡人侯者何待

也何待焉陳蔡將遇我而徼之也何以書譏何譏爾
 大國有攻伐之師小國有城守之兵不逆詐不億不
 信過而徼之非義也甲午治兵治兵者何習戰也出
 曰治兵入曰振旅常事不書此何以書譏何譏爾春
 而治兵不時也治兵以俟陳蔡也何以不言地國中
 則不言地何以不言公國中則不言公夏師及齊師
 圍邾邾者何國也邾降于齊師降者何降之者何降
 者未失其國家者也降之者失其國家者也未失其
 國家者復見失其國家者不復見猶遷也秋師還未
 有言師還者此其曰師還何還者善辭也還者事已
 畢也何善焉師及齊師圍邾邾降于齊師公子慶父
 怒請伐齊師莊公曰不可我實不德齊師何罪罪我
 之由夏書曰臯陶邁種德德乃降黎民懷之修德而
 已矣令之還師故君子以其克己為仁不伐為義冬
 十有一月癸未齊無知弒其君諸兒

九年春齊人殺無知傳曰雍廩殺之雍廩殺之則其
 稱人以殺之何討賊之辭也齊僖公之弟年生公孫
 無知僖公愛之為其衣服禮秩皆如適及襄公絀無
 知無知怒襄公使連稱管至父戍葵丘瓜時而往曰
 及瓜而代期戍公問不至請代弗許二人者大怒因
 無知以作亂襄公好田自具丘而歸賊從之入于公
 宮而弒之無知自立國人莫順雍廩殺無知公及齊

大夫盟于莒其言及齊大夫何盟納子糾也盟納子糾則何以不名其大夫公之納子糾其所納也若曰為齊大夫則可以納也夏公伐齊納糾此子糾也何以不曰子諱也曷為諱襄公之子也父母之仇弗與共天下昆弟之仇弗與共國君之仇眎父母師友之仇眎昆弟然則其言納子糾宜也公納之不宜也或問于孔子曰以德報怨何如孔子曰何以報德以直報怨以德報德齊小白入于齊其言入何逆辭也糾貴而小白賤也秋七月丁酉葬齊襄公八月庚申及齊師戰于乾時我師敗績內不言敗此其言敗何公佚獲也戰而大敗公喪戎路傳乘而歸秦子梁子以公旗辟于下道蓋僅然後免爾師敗取也佚獲辱也恥可言辱不可言也九月齊人取子糾殺之其謂之子糾何貴也何貴焉宜焉君者也齊人以兵加魯曰子糾親也請君討之管仲召忽讎也請以戮于齊魯人殺子糾此魯人殺也則其曰齊人取之何甚齊侯也內私人之國而奪焉外敗人之師而脅焉是取其子糾戮之而已矣冬浚洙洙者何水也浚之者何深之也曷為深之畏齊也

十年春王正月公敗齊師于長勺二月公侵宋曷為或言侵或言伐無鐘鼓曰侵有鐘鼓曰伐侵淺事也伐精事也三月宋人遷宿遷者何遷之者何遷者其

欲也遷之者非其欲也遷者其國家復見者也遷之者其國家不復見者也宿者何國也夏六月齊師宋師次于郎公敗宋師于乘丘此次也其言敗何譏之也何謂譏之齊師宋師次于郎未知其伐我與伐人與公子偃曰宋師不整擊之勝無幸焉莊公從之自雩門出蒙馬以虎皮而犯之大敗宋師次者不以義勝者不以道交譏之九月荆敗蔡師于莘以蔡侯獻舞歸荆者何楚也楚則曷為謂之荆荆者其自名者也楚者中國名之者也其不曰荆子何也夷狄之夷狄之者何中國有君有大夫盛德也夷狄無君無大夫夷狄云而已矣吳楚齊越以國稱君以人稱大夫略之也曷為略之有王者則後至無王者則先叛其禮與其號不可以通乎天下蔡侯獻舞何以名絕曷為絕去位而虜也死社稷正也逃之罪也猶有恥焉虜賤甚矣冬十月齊師滅譚譚子奔莒何以不言出國已滅矣無所出也

十有一年春王正月夏五月戊寅公敗宋師于郟秋宋大水此宋大水也何以書弔焉爾主人告災不告異諸侯弔災不弔異告異則書之弔災則書之宋大水公使弔焉曰天作淫雨害于棗盛若之何不弔主人對曰孤實不敬天降之災又以為君憂拜命之辱臧文仲說是言也曰禹湯罪已其興也勃焉桀紂罪

人其亡也忽焉列國有凶而稱孤者禮也言懼而名禮宋其庶乎冬王姬歸于齊何以書我主之也我主之則曷為不言我主之常事不書必非常然後書十有二年春王三月紀叔姬歸于鄆此紀叔姬也其言歸于鄆何順紀季也何順乎紀季言季之以鄆入于齊後紀而已矣夏四月秋八月甲午宋萬弒其君捷及其大夫仇牧及者何累也弒君多矣舍此無累者乎曰有孔父荀息皆累也舍孔父荀息無累者乎曰有有則此何以書賢也何賢乎仇牧仇牧可謂不畏彊禦矣仇牧之不畏彊禦奈何萬嘗與莊公戰獲乎莊公莊公歸散舍諸宮中數月然後歸之歸反為

大夫於宋與閔公博婦人皆在側萬曰甚矣魯侯之傲魯侯之美也天下諸侯宜為君者唯魯侯爾閔公矜此婦人妒其言顧曰此虜也爾虜焉故魯侯之美惡乎至萬怒搏閔公絕其脰仇牧聞君弒趨而至遇之于門手劍而叱之萬臂撥仇牧碎其首仇牧之智則未仇牧之忠則盡矣疾其疾而忘其力憂其憂而忘其生仇牧可謂不畏彊禦矣冬十月宋萬出奔陳十有三年春齊人宋人陳人蔡人邾人會于北杏此大國也皆微者乎非微者也微者之會不志然則其稱人何大夫之交政於中國自此始故貶之也盟會者君之禮也非臣之禮也大夫之交政於中國眾矣

四百七
易為獨貶乎此盡貶之則不可勝貶故於其始一貶
焉其餘從同同夏六月齊人滅遂秋七月冬公會齊
侯盟于柯

十有四年春齊人陳人曹人伐宋夏單伯會伐宋其
言會伐宋何往會之也秋七月荆入蔡冬單伯會齊
侯宋公衛侯鄭伯于鄆

十有五年春齊侯宋公陳侯衛侯鄭伯會于鄆夏夫
人姜氏如齊秋宋人齊人邾人伐郕宋其序齊上何
主兵者也諸侯無專征有伯者在焉伯者之先諸侯
專征也非伯者而先諸侯主兵也譏也此齊桓之師
何以不得為伯者桓猶未成乎伯也鄭人侵宋冬十月

十有六年春王正月夏宋人齊人衛人伐鄭秋荆伐
鄭冬十有二月會齊侯宋公陳侯衛侯鄭伯許男曹
伯滑伯滕子同盟于幽同盟者何殷同之盟也古者
諸侯之于天子春見曰朝夏見曰宗秋見曰覲冬見
曰遇時見曰會殷見曰同同盟之禮為宮方三百步
四門壇十有二尋深四尺加方明于其上方明者木
也方四尺設六色東方青南方赤西方白北方黑上
玄下黃設六玉上圭下璧南方璋西方琥北方璜東
方圭上介皆奉其君之旂置於宮尚左公侯伯子男
皆就其旂而立四傅擯天子乘龍載大旆象日月升
龍降龍出拜日於東門之外反祀方明諸侯既皆聽

命因相與盟于下方伯臨之以顯昭明同盟之禮也
 古者六歲而會十二歲而盟桓非受命之伯也假同
 盟之禮率諸侯以尊天子蓋自是始伯也然則孰會
 之公也公則曷為不言公疑之也曷為疑之齊魯之
 仇也不可以共天下從之則忘親弗從則忘君君子
 為其不得已焉雖勿忘其君亦勿忘其親是以設之
 辭也孝子忠臣之義見焉爾邾子克卒此邾儀父也
 其謂之邾子克何未成國曰邾儀父既成國曰邾子
 克未成國之君卒不書葬不記也

春秋劉氏傳第三

後學 成德 校訂

春秋劉氏傳第四

莊公下

十有七年春齊人執鄭詹鄭詹者何鄭大夫也執者
 曷為或稱行人或不稱行人稱行人者執之以其所
 為使者也不稱行人者執之不以其所為使及非行
 人者也夏齊人殲于遂殲者何盡也何言乎齊人盡
 于遂齊侯滅遂使兵戍之遂之餘民因氏領氏工婁
 氏須遂氏飲戍者酒而殺之此遂人盡齊人也其曰
 齊人殲于遂何弗與也墟人之國殺人之君私人之
 土制人之衆彊不義之至也力多矣非有能盡齊者
 也齊自盡也秋鄭詹自齊逃來何以書譏何譏爾譏
 逃也以爲義死制云乎以爲不義死道云乎君子不

曰幸而免冬多麋何以書記異也何異爾為災也
 十有八年春王三月日有食之夏公追戎于濟西此
 未有言伐我者其追何迹之也迹之則曷為不言其
 來不言其來者唯欲迹之也曰開之以虛示之以利
 後之以發見之以至云爾為諼也其言于濟西何不
 及也不及則曷為不言其不及戎已遠矣為諼之過
 也秋有蠶何以書記異也何異爾非中國之獸也冬
 十月

十有九年春王正月夏四月秋公子結媵陳人之婦
 于鄆遂及齊侯宋公盟媵者何送女也遂者何生事
 也大夫無遂事遂而權國義也其權國奈何齊侯宋
 公之在鄆則魯人憂大夫以君命出苟有以安國家
 利社稷者則專之可也結之遂乎盟春秋與之何用
 見春秋與之公子之尊非稱也媵陳人之婦非志也
 于鄆非地也稱所非稱以見義志所非志以見事地
 所非地以見權唯義為可以權夫人姜氏如莒冬齊
 人宋人陳人伐我西鄙此伐我也其如鄙何伐我而
 言鄙者遠之也曷為遠之非我之咎也
 二十年春王二月夫人姜氏如莒夏齊大災災則其
 言大何大非一也宗廟廡庫盡矣此齊火災也何以
 書弔焉爾弔人者哀其禍而救其乏秋七月冬齊人
 伐我

二十有一年春王正月夏五月辛酉鄭伯突卒秋七月戊戌夫人姜氏薨冬十有一月葬鄭厲公

二十有二年春王正月肆大眚肆者何赦也眚者何罪也肆大眚何以書譏何譏爾肆大眚非禮也癸丑葬我小君文姜陳人殺其公子御寇公子非大夫也何以書公之嫡子也公之嫡子則世子也其謂之公子何嫡子既誓稱世子未誓稱公子雖未誓書也殺世子母弟自君此其曰陳人殺之何世子以誓為貴責成而目君其曰陳人殺之者病御寇也曷為病之御寇之為人子也蓋足以殺其身已矣夏五月此其以五月首時何春秋故史也有所不革子曰其事齊桓晉文其文則史其義則丘竊取之矣秋七月丙申及齊高傒盟于防冬公如齊納幣納幣不書此何以書譏何譏爾譏喪取也昏禮有納采有問名有納吉有納徵有告期大夫之事也親納幣亦非禮也交譏之

二十有三年春公至自齊祭叔來聘祭者何邑也叔者何字也曷為氏邑而字天子之下大夫也下大夫爵附庸是必使人則其不稱使何不與使也曷為不與使下大夫無臣雖有臣猶不外交也夏公如齊觀社何以書譏何譏爾諸侯越竟觀社非禮也莊公將如齊觀社曹劌諫曰不可夫禮所以整民也故會以

訓上下之則制財用之節朝以正班爵之義帥長幼之序征伐以討其不然諸侯有王王有巡守以大習之非是君不舉矣君舉必書書而不法後嗣何述莊公弗聽公至自齊荆人來聘公及齊侯遇于穀穀者何內之邑也蕭叔朝公蕭叔者何附庸之君也其言朝公何公在穀也朝於廟禮也於外非禮也秋丹桓宮楹何以書譏何譏爾天子之楹黜諸侯墜大夫倉士黹丹楹非禮也冬十有一月曹伯射姑卒十有二月甲寅公會齊侯盟于扈

二十有四年春王三月刻桓宮桷何以書譏何譏爾天子之桷斲之礮之加密石焉諸侯斲之礮之大夫斲之士斲本刻桷非禮也葬曹莊公夏公如齊逆女常事不書此何以書譏何譏爾譏以雝之子共宗廟也秋公至自齊八月丁丑夫人姜氏入何以不致不見乎宗廟也夫人至必見乎宗廟稱來歸焉禮也不見乎宗廟則何以謂之入入者逆辭也國君娶夫人之辭曰請君之玉女共宗廟社稷之事知其不可娶也則勿娶而已矣知其不可娶然且娶之因是焉廢宗廟之禮悖矣戊寅大夫宗婦覲用幣宗婦者何大夫之妻也覲者何見也見則曷為謂之覲公事曰見私事曰覲見夫人禮也曷為以私言之夫人不見乎宗廟則不正不正不可以臨諸臣故以私言之也覲

用幣何以書譏何譏爾孤執帛卿執羔大夫執鴈士執雉婦人棗栗股脩用幣非禮也御孫曰男女無別自此始矣大水冬戎侵曹曹羈出奔陳曹羈者何曹世子也何以名貶曷為貶羈不子也赤歸于曹赤者何曹之庶公子也此曹之庶公子曷為不繫曹貶曷為貶曹非赤之所可號歸非赤之所可名歸非赤之所可名則其曰赤歸于曹何易也何易爾易乎戎也郭公郭公者何無聞焉爾或曰是郭亡也孰亡之蓋齊滅之齊滅則其曰亡何郭公善善而不能惡惡而不能去非有能亡郭者也郭自亡也

二十有五年春陳侯使女叔來聘夏五月癸丑衛侯朔卒六月辛未朔日有食之鼓用牲于社何以書譏何譏爾鼓用牲于社非禮也鼓用牲于社何以為非禮日有食之天子不舉伐鼓于社諸侯用幣于社伐鼓于朝陰陽之事而君臣之義也伯姬歸于杞秋大水鼓用牲于社于門何以書譏何譏爾大水鼓用牲于社于門非禮也大水鼓用牲于社于門何以為非禮也凡天災有幣無牲非日月之眚不鼓幣請之也鼓攻之也牲享之也鼓用牲于社于門非禮也冬公子友如陳

二十有六年春公伐戎夏公至自伐戎曹殺其大夫曷為或稱人以殺或稱國以殺或稱人而不名或稱

國而不名稱國以殺者罪累上也稱人以殺者殺有罪也稱人而不名者大夫無罪衆殺之也稱國而不名者大夫無罪君殺之也大夫無罪而君殺之非也雖有罪不以歸于京師亦非也孔子曰大夫疆而君殺之義也由三桓始也此之謂也秋公會宋人齊人伐徐宋其序齊上何主兵者也齊已先諸侯矣宋曷爲主之齊失其命使宋主之非制也諸侯不專征方有伯州有牧連有率卒有正不專征之義也冬十有二月癸亥朔日有食之

二十有七年春公會杞伯姬于洮何以書譏何譏爾天子非展義不巡守諸侯非民事不舉卿非君命不越竟公會杞伯姬于洮非禮也夏六月公會齊侯宋公陳侯鄭伯同盟于幽秋公子友如陳葬原仲原仲者何陳大夫也原氏也仲字也曷爲字卒從正葬從主人公子友如陳葬原仲何以書譏何譏爾君不行使乎大夫君行使乎大夫內之失正也大夫不交諸侯大夫交乎諸侯原氏失正也內失正原氏失正季子可以已矣則足從命也參譏之冬杞伯姬來其言來何直來曰來大歸曰來歸諸侯之女嫁于諸侯父母在歲一歸寧父母沒使大夫歸寧伯姬之來也已亟非禮也莒慶來逆叔姬莒慶者何莒大夫也其言逆叔姬何自爲逆也大夫非君命不越竟越竟逆女

非禮也然則嫁女於大夫書乎不書不書則此何以書以公之自主之也諸侯嫁女於大夫主大夫以與之公之自主之非禮也杞伯來朝公會齊侯于城濮二十有八年春王三月甲寅齊人伐衛衛人及齊人戰衛人敗績戰不言伐此其言伐何至之日也何以不地地國也此齊人伐衛也其曰衛人及齊人戰何戰而言及者主之者也猶曰衛人為志乎為此戰也云爾疾之也何為疾之戰者凶事也非所主也殺一不辜而得天下君子不為也夏四月丁未邾子瑣卒秋荆伐鄭公會齊人宋人救鄭冬築郟郟者何內之邑也築之者何始作邑也何以書非常也大無麥禾未有言災之者其曰大無麥禾何大無麥禾非災也大無麥禾矣何以謂之非災竭也國無九年之蓄曰不足無六年之蓄曰急無三年之蓄曰國非其國也大無麥禾病矣此飢也何以不言飢大無麥禾非飢也大無麥禾矣何以謂之非飢飢者在下也大無麥禾在上也古者冢宰制國用必於歲之杪量入以為出豐年不奢凶年不儉計而後知之計之道盡矣制之道不盡也臧孫辰告糴于齊告糴者何請糴也何以不稱使以為臧孫辰之私行也曷為以臧孫辰之私行臧孫辰曰賢者急病而讓夷居官者當事不避難在位者恤民之患是以國家無違以鬯圭玉磬如

齊告糴臧孫辰之自為功也徒以名而已矣害莫甚焉以為臧孫辰之私行可也君子之為國也恃己而不恃人貴義而不貴名有終身之憂而無一朝之恥也

二十有九年春新延廡延廡者何法廡也新之者何修舊也修舊書乎不書不書則此何以書譏爾譏不務公室也天子十有二閑馬六種諸侯六閑馬四種大夫四閑馬二種夏鄭人侵許秋有蜚何以書記異也何異爾非中國之禽也冬十有二月紀叔姬卒紀已滅矣其卒之何順紀季也何順乎紀季言季以鄫入于齊後紀而已矣城諸及防其言及之何先諸而後防也

三十年春王正月夏師次于成秋七月齊人降鄆鄆者何國也八月癸亥葬紀叔姬滅國不葬此何以葬順紀季而賢叔姬也何賢乎叔姬紀侯大去其國叔姬從焉紀侯卒叔姬歸于鄫婦人從人者也從不失節以是為賢也九月庚午朔日有食之鼓用牲于社冬公及齊侯遇于魯濟齊人伐山戎此齊侯也其稱人何貶曷為貶齊侯曰我北伐山戎至于孤竹嶽濱諸侯莫敢不來雖三代受命何以異蓋封乎太山禪乎梁父齊之僭天子自伐山戎始焉

三十有一年春築臺于郎何以書譏何譏爾譏厲民

也天子有靈臺以候天地諸侯有時臺以候四時去國而築臺是樂而已矣夏四月薛伯卒築臺于薛六月齊侯來獻戎捷捷者何軍獲也蠻夷戎狄不用正命方伯征之獻其功於王王以警于夷禮也諸侯相遺俘非禮也秋築臺于秦冬不雨何以書記異也曷爲或歷時而言不雨或歷月而言不雨一時不雨則書之一時不雨書之常也歷時而言不雨慢也無志乎民也歷月而不言雨閔也有志乎民也

三十有二年春城小穀夏宋公齊侯遇于梁丘何以書我接之也則其先宋何宋主齊也宋何以主齊齊遠而宋近也席則有上下室則有奧阼諸侯之事重

主輕大主小近主遠貴主賤秋七月癸巳公子牙卒傳曰殺也孰殺之公子友殺之公子友何爲殺公子牙公子慶父公子牙者同母兄弟也通乎夫人以脅公公疾召公子牙而問後焉曰寡人即不起此病吾將焉致乎魯國牙對曰魯一生一及君已知之矣慶父也材君何憂焉牙出公子季友入公亦問焉對曰臣以死奉般公曰鄉者牙曰慶父材季友曰夫何敢是將爲亂乎夫何敢季友以君命命牙待于鍼巫氏使鍼季酖之曰公子飲此則可以無爲天下戮笑必有後乎魯國不飲此則必爲天下戮笑必無後乎魯國于是從其言而飲之飲之歸未至而死然則曷爲

不言刺之隱也君親無將將而誅焉季友之除惡也於未形君子以為賢于誅孔子曰大夫強而君殺之義也自三桓始也此之謂也八月癸亥公薨于路寢冬十月己未子般卒子卒云子卒此其稱子般卒何君存稱世子君薨稱子某既葬稱子踰年稱公子般卒何以不書葬未踰年之君也有子則廟廟則書葬無子則不廟不廟則不書葬公子慶父如齊狄伐邢

閔公


元年春王正月公何以不言即位繼弒君不言即位孰繼繼子般也孰弒子般慶父也莊公存之時圉人犖淫于宮中子般執而鞭之莊公曰不可鞭也不如殺之是有力焉能投蓋于稷門子般弗果殺莊公死子般即位慶父將弒君以取其國使謂犖曰般之辱爾國人莫不知盍弒之矣遂弒子般于次季友奔陳閔公者莊公之子也生八年矣慶父立焉討犖而歸獄焉不知慶父之意利其幼與國人不從與閔公既立慶父以君事聘于齊不知慶父之意自釋于國人與憂大國之討與然而所以立閔公則慶父之力也所以繼子般則非閔公之志也出奔者曷為或書或不書書者治之也不書者予之也季友奔陳其為予之奈何莊公死子般弒慶父夫人亂乎內魯國之不絕若縊季子生則可以易死故不可以死而可以生

季子存則可以易亡故不可以存而可以亡其生也
賢於死其亡也賢於存是以雖出奔予之也齊人救
邢夏六月辛酉葬我君莊公秋八月公及齊侯盟于
落姑季子來歸其稱季子何賢之也貴之也曷為賢
之貴之其出也中權其入也中義蓋召之于陳也慶
父專魯則曷為召季子季子之賢內得於國人外聞
於諸侯則未知其以是為說與不得已與抑將圖之
與季子至而國人授之以政百姓歸焉殺公子牙今
將爾季子不免慶父弑君何以不誅非不誅也勢未
能也冬齊仲孫來仲孫者何齊大夫也此無事其曰
來何齊侯使之也齊侯使之則何以不言使譏何譏

爾莊公死子般弑閔公幼慶父夫人亂乎內魯國之
不絕若綫設以齊正魯猶反手也桓公使仲孫來省
難仲孫反曰不去慶父則魯難未止桓公曰去之奈
何對曰難不已將自斃君姑待之而已矣公曰然則
吾取魯可乎對曰不可猶秉周禮周禮所以本也臣
聞之國將亡本必先顛而後枝葉從之魯不棄周禮
未可動也君其務寧魯難而親之親有禮因重固間
攜貳覆昏亂霸王之器也桓公知魯之可憂而不知
使仲孫之非也誠苟憂之何問焉仲孫知魯之可親
而不知存慶父之非也誠苟親之何待焉交譏之
二年春王正月齊人遷陽夏五月乙酉吉禘于莊公

禘者何大祭也何大焉祭其祖之所自出以其祖配之然則曷為謂之禘禘猶帝也有虞氏禘黃帝而祖顓頊夏后氏禘黃帝而祖禹商人禘嚳而祖契周人禘嚳而祖文王是故不王不禘不王不禘魯何以禘昔者武王崩成王幼周公相成王攝天下七年制禮作樂頒度量而天下大服先王嘉之以周公為有勲勞故賜之大祭祀天子禮樂外祭則郊是也內祭則禘是也然則魯禘孰祭祭文王而配以周公孔子曰魯之郊禘非禮也周公其衰矣此禘也其言吉何言吉者未可以吉也曷為未可以吉未三年也三年矣曷為謂之未三年三年之喪實以二十五月其言于

莊公何言非宮廟也非宮廟者何君薨卒哭而祔祔而作主特祀於寢三年而升于廟禘非禮也吉禘亦非禮也於莊公亦非禮也八月辛丑公薨公薨何以不地弒也孰弒之慶父也何以不書葬賊未討也賊未討而葬慢也非臣子之事也九月夫人姜氏孫于邾公子慶父出奔莒冬齊高子來盟高子者何齊大夫也其稱高子何賢之也貴之也曷為賢之貴之莊公死子般弒閔公弒慶父夫人亂乎內魯曠年無君則國未知孰有之也齊侯使高子將南陽之甲而至以謀魯國高子因是平魯之難魯人賴焉僖公定位而後盟大夫在竟外有以尊社稷利國家則專之高



子可謂知禮矣魯人以為美談曰猶望高子也然則何以不稱使權在高子也十有二月狄入衛鄭弃其師鄭弃其師者何惡其上也鄭伯惡高克而欲遠之使將兵禦狄于境翱翔河上久而不召眾散而歸高克奔陳則是弃其師之道也

春秋劉氏傳第四

後學 成德 校訂

春秋劉氏傳第五

僖公上

元年春王正月公何以不言即位繼弒君子不言即位此非子也其稱子何臣子一例也齊師宋師曹師次于聶北救邢曷為先言次而後言救譏何譏爾次于聶北救邢言以為名而已矣非救入之道也夏六月邢遷于夷儀齊師宋師曹師城邢秋七月戊辰夫人姜氏薨于夷齊人以歸夷者何齊地也齊地則其言齊人以歸何夫人薨于夷則齊人以歸夫人薨于夷則齊人曷為以歸桓公召而縊殺之也楚人伐鄭八月公會齊侯宋公鄭伯曹伯邾人于櫓九月公敗邾師于偃冬十月壬午公子友帥師敗莒師于鄆獲



莒挈傳曰公子慶父弒閔公走而之莒莒人逐之將由乎齊齊人不納却反舍于汶水之上使公子奚斯入請季子曰公子不可以入入則殺矣奚斯不忍反命于慶父自南涘北面而哭慶父聞之曰嘻此奚斯之聲也諾已曰吾不得入矣於是杭榘經而死莒人聞之曰吾已得子之賊矣以求賂乎魯魯弗與為是興師而伐魯季子敗之獲莒挈莒挈者莒大夫也公賜季子汶陽之田及費費由是始大十有二月丁巳夫人氏之喪至自齊夫人何以不稱姜氏貶曷為貶夫人與於亂弒二君死不以其正不可以入宗廟然則曷為不於死焉貶夫人姜氏薨于夷齊人以歸則

上之行乎下也義已矣僖公請而葬之則是子命也君子以為非義是以貶乎其以喪至也
 二年春王正月城楚丘城楚丘者何衛之邑也曷為城之封衛也曷為不曰城衛不與封衛也曷為不與實與而文不與文曷為不與諸侯之義不得專封也諸侯之義不得專封則其曰實與之何上無天子下無方伯天下諸侯有相滅亡者力能救之則救之可也然則衛孰滅之狄滅之衛懿公為無道好鶴鶴有乘軒者國人皆怨狄師伐之懿公不能禦戰而死衛之遺民男女七百有三十人益之以共滕之民為五千人立戴公以廬于曹齊桓公使公子無虧帥車三


百乘甲士三千人以戍曹歸之車馬器服焉俄而戴公卒文公立衛人不能國蓋自是封于楚丘然則孰城之我也我專城之與非專城之也桓公使之也桓公使之則曷爲不言使之諸侯之憂危禍災者則四鄰救焉道也夏五月辛巳葬我小君哀姜虞師晉師滅夏陽夏陽者何虢之邑也此虢之邑其言滅何國舉也國舉矣則曷爲書夏陽言虢之所以爲虢者恃夏陽也且君存焉滅國多矣何爲獨言乎虢之恃夏陽見非獨虢之恃夏陽也虞亦恃焉滅下陽二國喪矣此滅虢也其言二國喪何晉獻公朝諸大夫而問焉曰寡人夜者寢而不寐其意也何諸大夫有進而

對者曰寢不安與其諸侍御有不在側者與獻公不應荀息進曰虞虢見與獻公揖而進之遂與之入而謀曰吾欲攻虢則虞救之攻虞則虢救之如之何願與子慮之荀息對曰君若用臣之謀則今日取虢而明日取虞爾君何憂虞焉獻公曰然則奈何荀息曰請以屈產之乘與垂棘之白璧往請假道於虞必可得也則寶出之內藏藏之外府馬出之內廐繫之外廐爾君何喪焉獻公曰諾雖然宮之奇存焉如之何荀息對曰宮之奇之爲人也達心而懦又少長於君達心則其言略懦則不能強諫少長於君則君狎之且虞公貪而好寶見寶必不從其言請終以往於是

終以往謂虞公曰冀為不道入自顛軫伐鄭三門冀之既病則亦唯君故今虢為不道保於逆旅以侵敝邑之南鄙敢請假道以請罪于虢虞公將許之宮之奇果諫語曰脣亡則齒寒虞虢之相救非相為賜則晉今日取虢而明日虞從而亡爾君請勿許也虞公不從其言終假之道起師會之以取虢還四年反取虞虞公抱寶牽馬而至荀息見曰臣之謀何如獻公曰子之謀則已行矣寶則吾寶也雖然吾馬之齒亦已長矣蓋戲之也秋九月齊侯宋公江人黃人盟于貫冬十月不雨何以書記異也楚人侵鄭

三年春王正月不雨夏四月不雨徐人取舒舒者何附庸之國也六月雨不雨言不雨此其曰六月雨何一時不雨則書之歷時而言不雨慢也無志乎民也歷月而言不雨閔也有志乎民也六月雨云者樂之也憂之故樂之也憂以天下樂以天下秋齊侯宋公江人黃人會于陽穀冬公子友如齊蒞盟蒞盟者何往盟乎彼也來盟者何來盟乎我也前定之盟也楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰潰者何散也民逃其上也侵淺事也侵蔡而蔡潰桓公可謂知所侵矣遂伐楚次于陘此伐楚也曷為次于陘止師以修文告之命古者邦內



甸服邦外侯服侯衛賓服蠻夷要服戎狄荒服甸服者祭侯服者祀賓服者享要服者貢荒服者王日祭月祀時享歲貢終王不祭則修意不祀則修言不享則修文不貢則修名不王則修德序成而有不至則修刑故刑不祭伐不祀征不享讓不貢告不王伐國者蓋賓之也非殘之也次于陘義矣夏許男新臣卒諸侯卒于師曰師卒于會曰會此卒于師其不曰卒于師何非卒于師曰師在楚許之間許男復焉古者君即位而為禘歲一漆之出疆必載禘卒于師曰師卒于會曰會正也許男新臣卒非正也楚屈完來盟于師盟于召陵屈完者何楚大夫也楚之大夫未有

以名聞者也其曰屈完何進之也曷為進之服罪也其服罪奈何諸侯之師次于陘楚子使與師言曰君處北海寡人處南海唯是風馬牛不相及也不虞君之涉吾地也何故管仲對曰昔召康公命我先君太公曰五侯九伯女實征之以夾輔周室賜我先君履東至于海西至于河南至于穆陵北至于無棣爾貢包茅不入王祭不供無以縮酒寡人是徵昭王南征而不復寡人是問對曰貢之不入寡君之罪也敢不共給昭王之不復君其問諸水濱于是請盟然則何以不稱使權在屈完也大夫以君命出苟可以尊社稷利國家則專之屈完可謂知畏義矣來盟于師則

春秋左傳卷五

五

通志堂

其曰盟于召陵何來盟于師屈完之志也盟于召陵桓公之事也還師召陵以成屈完桓公曰以此眾戰誰能禦之以此攻城何城不克屈完曰君若以德綏諸侯諸侯誰敢不服君若以力楚國方城以為城漢水以為池雖眾無所用之齊人執陳袁濤塗濤塗之罪何辟軍之道也其辟軍之道奈何濤塗謂桓公曰君既服南夷矣何不選師濱海而東服東夷且歸桓公曰諾於是還師濱海而東大陷于沛澤之中顧而執濤塗稱人而執者非伯討也此執有罪何以不得為伯討古者周公東征則西國怨西征則東國怨桓公假道于陳而伐楚則陳人不欲其反由己者師不

正故也不修其師而執濤塗古人之討則不然也秋及江人黃人伐陳不言及之者何內師也八月公至自伐楚葬許穆公冬十有二月公孫茲帥師會齊人宋人衛人鄭人許人曹人侵陳

五年春晉侯殺其世子申生曷為直稱晉侯以殺殺世子母弟直稱君者甚之也甚之奈何晉獻公之夫人曰齊姜生太子申生又娶二女于戎大戎狐姬生重耳小戎子生夷吾晉伐驪戎驪戎男女以驪姬歸生奚齊其娣生卓子驪姬嬖欲立其子賂外嬖梁五與東關嬖五使言于公曰曲沃君之宗也蒲與二屈君之疆也不可以無主宗邑無主則民不威疆場無

主則啓戎心戎之生心民慢其政國之患也若使太子主曲沃而重耳夷吾主蒲與屈則可以威民而懼戎且旌君伐使俱曰狄之廣莫於晉為都晉之啓土不亦宜乎公說使太子居曲沃重耳居蒲夷吾居屈羣公子俱鄙唯二姬之子在絳晉始作二軍公將上軍太子將下軍士蔦曰太子不得立矣分之都城而位以卿先為之極又焉得立不如逃之無使罪至為吳太伯不亦可乎猶有令名與其及也太子弗從驪姬既讒太子而疏之謂太子曰君夢齊姜必速祭之太子祭於曲沃歸胙于公公田驪姬寘諸宮六日公至毒而獻之公祭諸地地墳與犬犬斃與小臣小臣亦斃姬泣曰賊由太子太子奔新城公殺其傅杜原欸而急太子或謂太子子辭君必辨焉太子曰君非姬氏居不安食不飽我辭姬必有罪君老矣吾又不樂然則其行乎太子曰君實不察其罪被此名也以出人誰納我乃縊而死申生可謂輕其死矣語孝則未也杞伯姬來朝其子何以書譏何譏爾杞伯姬來朝其子非禮也伯姬為志乎朝其子則是杞伯失夫之道矣諸侯相見曰朝以待人父之道待人之子內失正矣參譏之夏公孫茲如牟公及齊侯宋公陳侯衛侯鄭伯許男曹伯會王世子于首止曷為殊會王世子世子貴也世子猶世世子也秋八月諸侯盟于

通志堂

首止無中事復舉諸侯何也尊王世子而不敢與盟也尊則其不敢與盟何也盟者不相信故謹信也不敢以所不信而加於尊者故不敢盟也此一地也曷為再言首止善是盟也曷為善之王將以愛易世子桓公為是率諸侯會而盟之王室以安則是正乎不正不正則其嘉之何也王將以愛易世子諸侯莫知以爭則不可以諫則不得桓公控大國扶小國會世子于首止以尊天王為之也然而諸侯以睦天王以尊後嗣以定一會而父子君臣之道皆得焉故孔子曰正而不譎此之謂也鄭伯逃歸不盟其言逃歸何去其衆也國君去其衆猶曰匹夫之行也楚人滅弦弦子奔黃九月戊申朔日有食之冬晉人執虞公此滅也何以不言滅虞之滅于晉久矣非一日之積也此入而執也何以不言以歸地之緼於晉久矣國非其國也自滅夏陽始焉


六年春王正月夏公會齊侯宋公陳侯衛侯曹伯伐鄭圍新城秋楚人圍許諸侯遂救許冬公至自伐鄭七年春齊人伐鄭夏小邾子來朝鄭殺其大夫申侯稱國以殺大夫者罪累上也申侯之累上奈何首止之會鄭伯逃歸齊桓公率諸侯以伐鄭孔叔言於鄭伯曰心苟不兢何憚於病既不能彊又不能弱所以斃也國危矣請下齊以救國鄭伯曰吾知所由來矣

姑少待我對曰朝不及夕何以待君于是殺申侯以說于齊然則申侯之罪奈何申侯之為人臣也專利而不厭興事以自為功足以殺其身而已矣秋七月公會齊侯宋公陳世子款鄭世子華盟于甯母曹伯班卒公子友如齊冬葬曹昭公

八年春王正月公會王人齊侯宋公衛侯許男曹伯陳世子款盟于洮王人者何微者也曷為序乎諸侯之上先王命也鄭伯乞盟乞盟者何處其所而請與也其處其所而請與奈何蓋酌之也盟者齊信也酌之有不齊焉如勿酌而已矣信之有不義焉如勿信而已矣夏狄伐晉秋七月禘于太廟用致夫人用者

何用者不宜用也致者何致者不宜致也夫人者誰謂謂成風也成風者僖公之母莊公之妾也然則何言乎禘于太廟用致夫人于是成之為夫人也成之為夫人則何以書譏何譏爾譏以妾為嫡也譏以妾為嫡則何以不稱風氏言自是魯以妾為嫡也冬十有二月丁未天王崩傳曰惠王也

九年春王三月丁丑宋公御說卒夏公會宰周公齊侯宋子衛侯鄭伯許男曹伯于葵丘宰周公者何天子三公也天子之宰通乎天下宋其稱子何未逾年之君也然則其稱子何君薨嗣子諒陰百官總已聽於冢宰三年正也不能三年者其以凶禮行則言子



其以嘉禮行則言爵以嘉禮行者非也以凶禮行者亦非也君子不奪人之親人亦不可奪親也秋七月乙酉伯姬卒此未適人何以卒許嫁矣婦人許嫁字而笄之死則以成人之喪治之九月戊辰諸侯盟于葵丘此一地也曷為再言葵丘善是盟也曷為善之桓公曰誅不孝無易樹子無以妾為妻尊賢育才以彰有德敬老慈幼無忘賓旅士無世官官事無攝取士必得無專殺大夫無曲防無過糴無有封而不以告凡我同盟之人既盟之後言歸于好以是為盡禁矣諸侯咸諭乎桓之志蓋束牲載書而不歃血也甲子晉侯詭諸卒冬晉里克殺其君之子奚齊此未踰年之君也其曰殺其君之子奚齊何弒未踰年君之號也諸侯必踰年然後稱君必三年然後成君諸侯曷為必踰年然後稱君必三年然後成君一年不二君緣民臣之意不可曠年無君緣孝子之意則三年不忍當也

十年春王正月公如齊狄滅温温子奔衛晉里克弒其君卓及其大夫荀息及者何累也弒君多矣舍此無累者乎曰有孔父仇牧皆累也舍孔父仇牧無累者乎曰有有則此何以書賢也何賢乎荀息荀息可謂不食其言矣其不食其言奈何晉獻公殺太子申生而立奚齊使荀息傅之公疾病召荀息而問之曰

士何如則可謂之信矣荀息對曰使死者反生生者
 不愧乎其言則可謂信矣獻公死奚齊立里克謂荀
 息曰君殺正而立不正廢長而立幼如之何願與子
 慮之荀息曰君嘗訊臣矣臣對曰使死者反生生者
 不愧乎其言則可謂信矣里克知其不可與謀退弑
 奚齊荀息立卓子里克弑卓子荀息死之荀息之智
 則未荀息之義則盡矣託六尺之孤寄百里之命臨
 大節而不可奪荀息可謂不食其言矣夏齊侯許男
 伐北戎晉殺其大夫里克里克弑二君曷為不以討
 賊之辭言之不君奚齊卓子不成其弑之名也曷為
 不君奚齊卓子驪姬殺太子申生而逐重耳夷吾以
 立奚齊晉國遂大亂諸侯皆怨是雖為君國人不君
 也國人不君則其曰里克殺其君卓子何是里克之
 君也里克之君奈何驪姬將殺申生而難里克謂優
 施曰如之何優施曰吾來里克一日而已子為我具
 特羊之饗吾以從之飲酒驪姬許諾使優施飲里克
 酒優施起舞且歌曰暇豫之吾吾不如烏烏人皆集
 於苑已獨集於枯里克笑曰何謂苑何謂枯對曰其
 母為夫人其子為君苑也其母既死其子又有謗枯
 也枯且有傷優施出里克辟奠不餐而寢夜半告優
 施曰曩而言戲乎抑有所聞之乎曰然君既許夫人
 立奚齊矣里克曰秉君以殺太子吾不忍通復故交



吾不敢中立其免乎優施曰免旦而里克見平鄭曰
 難將作矣優施告我君許夫人立奚齊矣平鄭曰子
 謂何曰吾對以中立平鄭曰惜也不如曰不信以疏
 之亦固太子以攜之多為之故以變其志志少疏乃
 可間也今日曰中立固其謀也里克曰往言不可及矣
 且人中心唯無忌何可敗也稱疾不朝三旬難乃成
 放乎殺申生而立奚齊者是乃里克也殆而悔之則
 無及矣然後殺奚齊卓子而反國乎重耳故曰殺其
 君也重耳者申生之弟也賢而有謀國人願立焉將
 迎之狄惠聞之自秦先入於是殺里克也曰爾既殺
 夫二孺子矣為子君者不亦難乎而殺之秋七月冬
 大雨雪何以書記異也

十有一年春晉殺其大夫平鄭父其稱國以殺何稱國
 以殺大夫者罪累上也平鄭父里克之與也夏公及
 夫人姜氏會齊侯于陽穀秋八月大雩冬楚人伐黃
 十有二年春王三月庚午日有食之夏楚人滅黃秋
 七月冬十有二月丁丑陳侯杵臼卒
 十有三年春秋侵衛夏四月葬陳宣公公會齊侯宋
 公陳侯衛侯鄭伯許男曹伯于鹹秋九月大雩冬公
 子友如齊


春秋劉氏傳第五

後學

成德

校訂

通志堂



Faint vertical text in seal script, likely bleed-through from the reverse side of the page. The characters are difficult to decipher due to fading and the style of the script.



